

## MISA CON NENOS

5 de maio de 2019. Domingo 3º de Pascua - C  
XOÁN 21, 1-19: "É o Señor!"



**¡¡¡ É XESÚS !!!, só EI  
fai milagres no COTIÁN .**

## 1. A COLLIDA

**Irmáns e irmás:** esta Comunidade reunida para escoitar a Palabra de Deus e para a Fracción do Pan, é o signo evidente da Resurrección de Xesús. A verdadeira fe nace sempre do encontro persoal con Cristo como compañeiro de camiño. Só el nos pode facer vivir, amar e esperar malia os nosos erros, fracasos e pecados. En cada eucaristía recordamos os tres agasallos que Xesús nos fai no evanxeo de hoxe: o seu Pan, a súa Palabra e unha Misión.

**(Sacerdote)** *-No nome do Pai... Cristo resucitado que se nos achega na vida cotiá, regálanos o Pan da Eucaristía e multiplica a eficacia das nosas tarefas pastorais, sexa convosco...*

## 2. ASPERSIÓN COA AUGA

**(Sacerdote ou monitor):** - En Pascua realizamos o xesto da aspersión da auga sobre nós. A auga, lava, purifica. Ao recibir a auga nas nosas cabezas recordamos a auga do bautismo e pedimos ao Señor que nos lave e perdoe todos os nosos pecados para celebrar mellor a festa da Eucaristía na que Cristo se fai presente entre nós.

**(Sacerdote)** *-Quita Señor, a nosa debilidade e as nosas impurezas para que, dese xeito, podamos seguir dando sinais claros de que somos os teus amigos e seguidores **(Aspersión ao pobo)**.*

### 3. PERDÓN (Alternativa)

*(Sacerdote):* Recoñezamos os nosos pecados:

*(Posible catequista):* -Porque non fixemos o ben que Ti queres nin valoramos a Eucaristía suficientemente: **Señor, ten piedade de nós.**

*(Posible pai - nai):* -Porque nos momentos de dificultade non o intentamos “no teu nome”, polo teu poder: **Cristo, ten piedade de nós.**

*(Posible catequista):* -Porque temos contrariado a túa vontade en moitas ocasións e non demos testemuño claro da nosa fe: **Señor, ten piedade de nós.**

### 4. PALABRA DE DEUS

#### MONICIÓN ÁS LECTURAS

Os apóstolos por anunciar a resurrección son perseguidos. Pero eles queren dar testemuño desa verdade que dá vida a quen a cre. No evanxeo de hoxe, Xesús aparéceselles, unha vez máis, no traballo cando sentían o baleiro. Xesús éncheos e celebra o banquete e a fracción do pan.

**Feitos dos Apóstolos 5, 27b-32. 40b-41: Testemuñas disto somos nós e o Espírito Santo.**

**Salmo 29: Eu lóote, Señor, porque me libraches.**

**Apocalipse 5, 11-14 Digno é o Añño degolado de recibir o poder e a riqueza.**

**Xoán 21,1-19: Xesús achegouse, tomou o pan e déullelo, e o mesmo o peixe.**

**Narrador:** Naquel tempo, Xesús aparecéuselles outra vez aos discípulos

xunto ao lago de Tiberíades. E aparéceselles deste xeito: Estaban xuntos

Simón Pedro, Tomé, alcumado o Xemelgo; Natanael, o de Caná de Galilea;

os Zebedeos e outros dous discípulos seus. Simón Pedro díxolles:

**Pedro:** -«*Vou pescar*».

**Narrador:** Eles contéstanlle:

**Apóstolos:** -«*Imos tamén nós contigo*».

**Narrador:** Saíron e embarcáronse; e aquela noite non colleron nada. Estaba xa amencendo, cando Xesús se presentou na beira; **pero os discípulos non sabían que era Xesús**. Xesús díxolles:

**Xesús:** -«*Rapaces, tendes peixe?*».

**Narrador:** *Eles contestaron:*

**Apóstolos:** -«*Non*».

**Narrador:** *El dilles:*

**Xesús:** -«*Botade a rede á dereita da barca e atoparedes*».

**Narrador:** Botárona, e non podían sacala, **pola multitude de peces**. E aquel discípulo a quen Xesús amaba díxolle a Pedro:

**Xoán** -«*É o Señor*».

**Narrador:** Ao oír que era o Señor, Simón Pedro, que estaba espido, atouse a túnica e botouse á auga. Os demais discípulos achegáronse na barca, porque non distaban de terra máis que uns douscentos cóbados, remolcando a rede cos peixes. Ao saltar a terra, viron unhas brasas cun peixe posto encima e pan. Xesús díxolles:


**Xesús** -«*Traede dos peixes que acabades de coller*».

**Narrador:** Simón Pedro subiu á barca e arrastrou ata a beira a rede repleta de peixes grandes: cento cincuenta e tres. E aínda que eran tantos, non se rompeu a rede. Xesús díxolles:

**Xesús:** -«*Vamos, xantade*».

**Narrador:** Ningún dos discípulos atrevíase a preguntarlle quen era, porque sabían ben que era o Señor. Xesús achegouse, tomou o pan e déullelo, e o mesmo o peixe. Esta foi a terceira vez que Xesús se apareceu aos discípulos logo de resucitar de entre os mortos.

*(Narrador-Xesús-Apóstolos-Pedro)*



## 5. ORACIÓN DA COMUNIDADE

**(Sacerdote):** *Presentamos as nosas oracións proclamando a Cristo Resucitado dicindo:*

**- Creo na túa presenza, Señor.**

1. Que os pastores da Igrexa sexan os primeiros en fiarse de ti, en amar e servir. Que nos axuden a todos a descubrir a Xesús como o Señor, o amigo, o Salvador. Oremos.
2. Que a nosa comunidade de .... sinta a presenza de Xesús resucitado no medio dela. Oremos.
3. Que descubramos a Xesús nos compañeiros, nos que pasan ao noso lado, nos pobres. Oremos.
4. Que valoremos a misa do domingo descubrinto a presenza de Xesús no Pan e na Palabra e digamos como Xoán: "É o Señor!". Oremos.
5. Que nas dificultades da vida botemos as redes en nome do Señor intentándoo de novo coa súa axuda e a súa forza. Oremos.
6. Polos rapaces que se preparan para a Primeira Comuñón ou a Confirmación. Oremos.

## 6.PRESENTACIÓN DE OFRENDAS (Posibilidades)

### - **RED:**

Con esta rede queremos dicirlle ao Señor que estamos dispostos a seguir formando parte do seu equipo. É dicir; queremos dar a coñecer a mensaxe de salvación.

### - **BANDEXA DE FROITAS:**

Con esta bandexa repleta de froitos queremos simbolizar a alegría da Pascua. Si o Señor resucitou, nós -como froito da Pascua- tamén resucitaremos a unha nova vida.

### - **VARA DE MAGO:**

Nesta Pascua queremos ofrecerche as tarefas pastorais que realizamos na parroquia (ou comunidade). Nós esforzámonos moito por continuar a túa tarefa na igrexa formándonos, celebrando a túa presenza no medio de nós e construíndo o Reino. Nesta varíña de mago queremos representarte a ti, que te necesitamos presente no medio da nosa pastoral para que coa túa presenza nos bendigas, nos multipliques e fagas eficaz as nosas tarefas pastorais.

### - **PAN E VIÑO:**

- Co Pan e o Viño queremos dar grazas a Deus porque quixo quedar connosco no altar. Que cada vez que celebremos a Eucaristía pensemos que é un adianto do que nos queda por vivir no ceo.



## POSIBLE ACCIÓN DE GRAZAS

### *Grazas polos tres regalos*

**Xesús, cada domingo vimos á comunidade parroquial** a atoparnos contigo, a sentir a túa presenza resucitada no medio de nós.

**Cada domingo na eucaristía alimentas a nosa fe** cos tres grandes agasallos de Pascua: **a Palabra, o Pan e a Misión.**

**Grazas pola túa Palabra chea de paz, de luz, de forza,** que nos empuxa a lanzarnos aos mares da vida con confianza, e guíanos para que botemos as redes **"no teu nome"** a pesar do desencanto, sendo prolongación das túas mans, e poidamos recoñecerte e confesarte: **É o Señor!**

**Grazas porque cada domingo preparas a mesa do Pan** e recórdasnos: **"Vamos, comed!"**. Así, recibimos o teu alimento, recuperamos as forzas e inxéctasnos a túa mesma vida divina.

**Grazas tamén porque como a Pedro nos envías a unha misión,** a misión de **"amarte"** a ti e a coidar os nosos irmáns, sendo testemuñas do amor que ti e o Pai nos tendes.

Xesús, grazas por facerte presente no medio de nós na comunidade parroquial.

FELIZ DOMINGO, DÍA DEL SEÑOR

RED CATEQUISTAS GALICIA